



Communicaziun a las medias

BarattaChor – aventura per chors e dirigents

Cuiria, ils 31-10-2017 - **In chor apprezzescha ses dirigent u sia dirigenta. Ma igl è la variaziun che fa bun tun. Perquai porscha Radiotelevision Svizra Rumantscha (RTR) il barat da dirigents e chors. Flavia Walder ed il chor maschadà da Sevgein dattan il culp da partenza.**

«BarattaChor» è in'acziun da RTR per promover il barat tranter las dirigentas, ils dirigents ma era tranter ils differents chors. Questa acziun dat novs impuls, pussibilitescha in barat da cultura e porta in vent frestg en las provas dals chors.

Per lantschar l'acziun porscha la dirigenta Flavia Walder in'emprova cun «ses» chor mischedau Sevgein e sa legra da pudair diriger in auter chor. Tgisa forsa schizunt in chor d'ina autra vallada. Ils chors interessads ad ina prova cun la dirigenta estra pon s'annunziar tar RTR. Tranter tut las annunzias tira Flavia Walder ils 14 da november 2017 la sort. Il chor cun la pli gronda fortuna gudogna la prova speziala cun ella sco dirigenta estra. Il dirigent dal chor che gudogna surprena viceversa la prova cun il chor mischedau Sevgein. Uschia sa repeta quest scenari adina vinavant. Il dirigent dal chor victur po silsunter far l'appel per il proxim «BarattaChor».

«A mai plascha l'idea da l'acziun. Jau sun da l'opiniun che quai saja ina chausa innovativa che porta variaziun en las provas da chor», di Flavia Walder. Flavia Walder (35) è musicista e pedagoga da ritmica. Dapi il 2010 dirigia ella il chor maschadà da Sevgein. Dasperas è ella era la dirigenta dal chor d'uffants Sumvitg e chanta sezza en il Cantus Firmus Surselva. Il chor mischedau Sevgein è vegnì fundà il cumenzament dals onns '80. Ma chantà vegniva gia avant a Sevgein. Il chor dumbra actualmain 30 commembers – 16 chantaduras e 14 chantadurs.

Ils chors che han interess da participar a l'acziun da RTR pon s'annunziar enfin ils 13 da november 2017 via formular sin rtr.ch ubain via la gruppa “Noss chors” sin la pagina da facebook da RTR. In di pli tard tira Flavia Walder alura la sort tranter tut las annunzias. L'acziun “BarattaChor” pon ins suandar sin rtr.ch.

Curt e cumpact – la survista da l'acziun «BarattaChor»

- Chors s'annunzian per far ina prova cun la dirigenta
- La dirigenta tira la sort, tgenin ch'i tutga
- La dirigenta fa ina prova cun il chor victur
- Il dirigent dal chor victur fa ina prova cun il chor da la dirigenta
- Il dirigent dal chor victur fa l'appel per il proxim «BarattaChor»

Dapli infurmaziuns

Radiotelevision Svizra Rumantscha, Via da Masans 2, 7000 Cuiria
Tamara Deflorin, scheffa communicaziun, tel. 081 255 75 09, tamara.deflorin@rtr.ch